

LIBER
GALENI
DE
SYMPTOMATUM
CAUSIS
SECUNDUS:

*In theses contractus, & publici ac solennis exerci-
tij gratiâ in inclytâ Argentoratensium
Academiâ ad disputandum propositus*

à

MELCHIORE SEBIZIO, MEDI-
CINAE DOCTORE AC PROFESSORE,
& Reipubl. Archiatro:

Respondente

M. LUDOVICO KEPPLERO,
Pragensi Bohemo.

In Auditorio Magno, Mense Octobr. Horis matutinis.



ARGENTORATI,

Typis EBERHARDI WELPERI,

ANNO MDCXXXI.



ILLUSTRISSIMO AC GENE-
ROSO DOMINO,

DN. MAXIMILIANO
COMITI AB & IN TRAUTMANS-
DORFF, EPISCOPALIS TEINIZII
Domino, Sac: Cæs: Majest: à Consilijis
Secretissimis:

U T E R

Illustribus ac Generosis Dominis,

Dn. HENRICO WILHELMO A STA-
RENBURG, Dn. in Kiedegg/Wildperg &
Lobenstein / Consiliario Cæsareo, & p. t. Or-
dinum Superanisanorum Directori :

Dn. JOH. PAULO GEYMANNO L.B.
in Galspach / Braittenegg / Ballern & Ross-
niz:

*Dominis Mecænatibus & Evergetis
suis gratiosissimis*

In grati animi *εὐχαρίων* suiq; & studiorum
suorum ulteriorem commendationem

*Exercitium hoc solenne inscribit &
humiliter offert*

M. Lüd. Kepplerus Pragâ Bohemus
Respondens.

LIBRUM GALENI DE CAUSIS SYMPTOMATUM SECUNDUM

Præfatiuncula.



E L A M, quam Galenus præcedenti libro primo de symptomatum causis, quæ in actionibus animalibus consistunt, inceperat, texendo persequitur, atq; ad finem perducit. Notum quippe, animales actiones esse triplices: sensitivas, motivas, & principes. Itaq; traditis symptomatum causis, quæ sensitivis accidunt functionibus, reliquum est, ut & causæ explicentur, quæ tùm in motricibus, tùm etiam in principibus observantur: id quod Galenus hoc in libro præstare conatur. PARTES ejus duæ sunt.

In primâ causæ symptomatum actionis motricis declarantur, multaq; *παθήματα, & ὡς ἐν παρόδῳ*, de vitiosorum motuum naturâ, & quomodo inter se conveniant, quomodoq; differant, interseruntur: Cap. I. 2. 3. 4. 5. & 6.

In secundâ causæ symptomatum actionis principis, quæ in phantasiam, ratiocinationem, & memoriam dividitur, breviter enarrantur: Cap. 7.

Potest autem pars prior iterum secari in membra tria.

In primo duodecim symptomata, quæ sub vitioso motu, tanquam sub communi aliquo genere, cõprehenduntur, recensentur, & quomodo inter se conveniant, quomodoq; differant, docetur. Cap. I.

In secundo horum motuum natura & causa explicantur.
Cap. 2. 3. 4. & 5.

In tertio ea, quae fusiùs & uberius de vitiosorum motuum
causis dicta erant, memoria gratiâ breviter & per capita repe-
tuntur. Cap. 6.

THESIS I.

Causas symptomatum, quae sensitivæ actionis noxa
sunt, Galenus præcedenti libro explicuit. Hoc secundo
declarat causas illorum, quae motricis & principis actionis
sunt læsiones.

2. Vocantur autem motricis actionis læsiones motus
vitiosi, quales sunt 12. sequentes. I. σπασμὸς, convulsio. II.
τρεμὸς, tremor. III. παλμὸς, palpitatio. IV. ρίγξ, rigor. V.
Φρίκη, horror. VI. λυγμὸς, singultus. VII. Ἑξ, tussis. VIII. ἐρύ-
γη, ructus. IX. πτασμὸς, sternutatio. X. σκορδινισμὸς, pandicu-
lacio. XI. χάσμη, oscitatio. XII. τρυσμὸς, stridor. Cap. 1.

3. Hi motus in eo inter se conveniunt, quòd genus ha-
beant commune: nimirum κίνησιν πλημελῆ, motum vitio-
sum, siue illegitimum. Differunt autem, tum modis alijs,
tum hoc uno primòque præcipuè: quod *quidam* illorum
sint ἔργα Φύσεως βιάως ἀναγκαζομένης κινῆσθαι πρὸς τινος αἰτίας
νοσέειν; opera naturæ, à causâ quapiam morbosâ violenter
moveri coactæ: ut *sternutatio, tussis, oscitatio, pandiculatio,*
& *singultus*. Alij νοσώδεσιν ἐπὶ πῶτα διαθήσεσιν, ἔδεν εἰς τὴν γένεσιν
αὐτῶν συμπτωμάτων Φύσεως, morbosos sequantur affectus,
naturâ ad ipsorum generationem nihil conferente: ut *pal-
pitatio & convulsio*. Alij deniq; ὅπ' ἀμφοῖν ἐν ἐργαῶν γίγνηται,
τῷ δὲ νοσήματι ἅμα & Φύσεως, ab ambobus simul fiant, natu-
râ & morbo, cum unâ operantur: ut omnes motus νερκώ-
δεις, torpidi, alijsq; eorum, qui adhuc resolvuntur, nondum
autem paralytici facti sunt, præterea etiam tremor. Cap. 1.
4. In-

4. Intelligitur autem hic per Naturam *πᾶσα δύναμις ἢ διοικῶσα τὸ ζῶον*, omnis facultas, quæ animal gubernat: si-
ve à voluntatis nostræ arbitrio pendeat, siue non. Totum
quippe facultatum animalium, vitalium, & naturalium
genus, quo animal regitur ac servatur, distinguitur à cau-
sis præter naturam, quæ animal lædunt atque corrumpunt.
Illæ enim animal servant sanum: hæ verò id ipsum de-
struunt & labefactant. *Cap. I.*

5. Hæ tres differentiæ motuum, primæ sunt, quarum
causæ hoc in libro enarrandæ. * Sunt verò & propriæ cu-
jusque, de quibus ordine dicendum, factò initio ab ijs mo-
tibus, qui *ὑπὸ τινὸς ἐμφύτῃ δυνάμει*, ab innatâ quadam fa-
cultate fiunt. *Cap. I.*

6. Vocatur innata facultas, à quâ reguntur ea omnia,
quæ nutriuntur: éstque quadruplex: 1. *ἐλκτική τῶν χρηστῶν*,
attrahens utilium. II. *καθεκτική τῶν ἀνίστων*, retentrix eorundē.
III. *ἀλλοιωτική*, alteratrix, siue concoctrix. IV. *ἀποκριτική τῶν*
περιττῶν, expultrix superfluatorum. *Cap. I.*

7. Sunt verò motus, qui ab innatâ prodeunt facultate,
duplices: alij *ἀκριφῶς κατὰ φύσιν*, exquisitè secundum na-
turam; fiuntque, cùm animal naturæ legibus gubernatur,
hoc est, nullo infestatur affectu præter naturam. Alij non
exquisitè secundum naturam: & accidunt, cùm quippiam
præter naturam in corpore consistit, quod naturam ad ex-
cernendum stimulat atque irritat. *Cap. I.*

8. Conveniunt inter se, quoniam ambo à naturâ, seu fa-
cultate insitâ oriuntur. Differunt autem, quia posteriores
non simpliciter à naturâ, sed à morbosâ causâ, naturam im-
pellente, fiunt: priores verò à naturâ simpliciter manant,
nullo, quod præter naturam sit, hanc cogente. *Cap. I.*

9. Cæterum, evenit, ut motus naturæ, siue facultatis, inter-
dum omninò sint *ἀνάσθητοι*, sensum; lateant: aliquando
verò sint *αἰσθητοί*, sensu percipiuntur. Priorum exempla

habemus in ἀδήλω διαπνοῇ, quando per eam supervacanea excernuntur. Posteriorum in vomitu, alvi dejectione, mictione &c.

10. Causas igitur depravatorum motuum, quorum 12. præcipua genera fuerunt recensita, exposituri, à sensibilibus motibus, retentione scilicet & excretionē, tum urinæ, tum fæcum, qui à naturâ vi quadam coactâ procedunt, ordiemur. Et quia cum motibus προαιρέτικοῖς convenientiam quandam habent, quatenus utrique cum loci mutatione & per fibras fiunt, utrosque, tum naturales, tum animales, sive voluntarios & προαιρέτικους, communi doctrinâ absolvemus.

11. Voluntarij motûs noxæ, sive symptomata, sunt 4. παράλυσις, σπασμός, τρόμος & νάρκη. Qui motus in particulis instrumentis variant, non solum τῇ τῶν συμπλημάτων ἰδέᾳ, accidentium specie: verum etiam τῇ προσηγορίᾳ, nomenclaturis. Cap. 2.

12. Manifestum hoc est primum in παραλύσει. Hæc enim alia symptomatis species est, si instrumentis respiratorijs: alia, si vocalibus: alia denique, si locutionis organis accidat. Diversas quoque in diversis instrumentis nomenclaturas sortitur. Cap. 2.

13. Etenim, παράλυσις instrumentorum respiratoriorum ἀπνοία: vocalium ἀφωνία appellatur. Linguae verò παράλυσις proprio nomine caret: quamvis illa ἔργον ἔσμικρὴν προαιρέσεως, haud exiguam & levem voluntatis actionem, ipsam scil. locutionem, auferat. Cap. 2.

14. Ἰσχυρία simile quid apnoeæ & aphoniae significare videtur: etsi non προαιρέτικῆς, sed φυσικῆς ἐνεργείας abolitio sit. Ut enim in apnoeâ respirationis, & in ἀφωνίᾳ vocis fit privatio: sic in ἰσχυρίᾳ excretionis urinæ. Urinæ verò præter voluntatem excretio, voluntariæ actionis noxa est. Eademque ratio est τῶν διαχωρημάτων, dejectionum alvi. Fæcum quip-

quippe retentio, φυσικῆς: excretio autem involuntaria, παρὰ φυσικῆς ἐνεργείας vitium est. Cap. 2.

15. Paralysews in modum etiam σπασμὸς suas habet species ac differentias. *Prima* est τρευσμὸς τῶν ὀδόντων ἀκύνειος, invitus dentium stridor: qui convulsio est musculorum mandibulariorum. *Secunda*, ὀφθαλμῶν, oculorum inversio, quæ alio nomine στραβισμὸς, oculorum distortio, obliquusque aspectus nuncupatur. *Tertia*, γονόρροια, profluvium seminis, quod genitalium partium veluti convulsio quædam est: ideoque pene fit rigido. Quodsi penis non rigeat, convulsio non est: sed retentricis facultatis imbecillitas. *Quarta*, λυγξήλυγμος, singultus. Nam & iste à quibusdam pro convulsionis specie habetur. *Quinta*, ἡ διπλὴ τῶν ἐσπνεόντων ἐπανάκλησις, geminata inspirantium revocatio. Evenit enim quandoque ob musculorum inspirationi servantium convulsionem. Nam inter inspirandum interdum spiritus subsistit, adeò ut conduplicatus intrò, tanquàm jam iteratà inspiratione revocetur. *Sexta*, ἐκπνεύσας εἶδος οἶον σπασμῶδες, species quædam expirationis quasi convulsoria: quæ & ipsa musculorum expirationi dicaturum convulsionem sequitur. Eam Hipp. πνεῦμα παύον ἐν τῇ ἐξω Φορῇ appellat, h. e. spirationem in eà, quæ fit extrà, sive sursum, latione offendentem, sive subsistentem: cùm scilicet spiritus in medio sui delatus, interrumpitur ac subsistit. *Septima*, ἐπιληψία, quæ est convulsio totius corporis. Cap. 2.

16. Speciebus παραλύσεως antea commemoratis addi possunt ἀποπληξία καὶ νάρκη, sive stupor. Et apoplexia quidem totius corporis παράλυσις est. Stupor verò levis, exigua, & obscura παράλυσις est. Stupidarum rursùm partium haud parva est ἐν τῷ μᾶλλον καὶ ἥττον differentia. Aliæ namq; magis, aliæ minùs stupent: quoniam stupor μικτόν πῶς ἐστὶ τὸ συμπῶμα, νοσήματός τε καὶ δυνάμεως, mixtum quodammodo accidens ex morbo & facultate. Cap. 2.

17. Nam

17. Nam si morbus facultatem omninò vicerit, tùm hæc membrum ampliùs movere non poterit. Si facultas superaverit, in movendo membro minimè impediatur. Quod si inter morbum & facultatem pugna sit, membrum quidem movebitur, sed *μόγισ*, difficulter. Nam si præceperis, ut homo membrum extendat, extentumque servet, præstare hoc minimè poterit. Facultas quidem membrum, quantum potest, attollet & sustinebit. Verùm, cùm debilis sit, & à causâ morbificâ suâ in actione impediatur, membrum ob nativam gravitatem decidet. *Cap. 2.*

18. De causis stuporis & resolutionis denuò dicere, nil attinet. Expositæ enim sunt *libro precedenti c. 5.* ubi dictum, nervum, aut frigore densatum, aut à crassis lentisq; humoribus obstructum, aut à quapiam re gravi pressum, *παρέλυσιν* & stuporem inducere. *Cap. 2.*

19. Sed ad *σπασμὸν* redeamus; & tùm quid sit, tùm quæ ejus causæ sint? enarremus.

20. Est autem ejusmodi malum, quod nervos ac musculos ad eum ducit affectum, ad quem animalis facultas in motibus voluntarijs eosdem ducebat. Nam quemadmodum motus voluntarius sit, retractis musculis ad suam originem: sic in *σπασμῶ* similiter nervi ac muscoli versus suum principium trahuntur. Sive igitur motus voluntarius peragatur, musculis versus suum principium retractis, quemadmodum communis est Medicorum sententia: sive, ut Pnevmatici docebant, musculis ab aliquo irruente spiritu impletis: eodem certè modo *σπασμὸς* fiet: nempe vel flatulento aliquo spiritu in musculis genito: vel alijs affectibus, in quorum albo phlegmone est, tensionem in iisdem efficientibus. *Cap. 2.*

21. Sunt verò affectuum genera, quæ *σπασμὸν* generant, secundum *Hippocratem* præcipuè duo: *πλήρωσις* & *κένωσις*, repletio & inanito. Sub *πληρώσει* comprehenduntur phlegmone,

mone, aliq; tumores in musculis & nervis nati. Sub κενώ-
σαι ardentissimæ & siccissimæ febres, quæ corporis partes
vacuant, & humiditates earum potenter absorbent. *Cap. 2.*

22. Catectum, quodd corpora nervosa plurimum imple-
ta vacuatâque tendantur, chordæ musicorum organorum
intentæ docent. Rumpuntur enim, siue in cubiculum ali-
quod humidum, siue in siccum intentæ reponantur. Quæ
causa est, quodd eas artifices, priusquam reponant, laxent.

23. Hinc apparet, rectè dictum fuisse antea, σπασμὸν à
solo morbo fieri, perinde ut ἀκίνησίαν, quietem, seu immo-
bilitatem, quæ observatur in παραλύσει membrorum. Hæc
enim & ipsa morbi occasione fieri solet. *Cap. 2.*

24. Notandum autem, non omnem ἀκίνησίαν à morbo
fieri: quia varia est & multiplex. I. quæ cernitur in para-
lyticis. In his enim partes resolutæ à motu cessant, ac quie-
scunt. II. quæ videtur in hominibus sanis, & κατὰ φύσιν se
habentibus, cum scil. manum extendentes, extensam ser-
vant immotam. III. quæ similiter in sanis deprehenditur,
quando manum super solidam aliquam rem reclinant,
omnèsque musculorum actiones relaxant. *Prima*, fit à so-
lo morbo, non secus ac σπασμὸς. *Secunda*, à facultate a-
nimali, manum sustentante, perinde ut motus hominum
sanorum. *Tertia*, neque à morbo, neque à facultate pro-
dire videtur. Non ab illo: quia manus præsupponitur sa-
na. Non ab hac: quoniam quiescit. Sed ab innatâ gravi-
tate, propter quam accidit, ut membrum solido in corpo-
re, quod illi substratum est, quiescat. *Cap. 2.*

25. Ex hisce quietis generibus secundum, quo manus
extensa servatur immota, reverà ex albo actionum est atq;
motionum, vocaturque κίνησις τονική. Potest tamen hic ex-
tentæ manûs status alio modo κίνησις: alio ἀκίνησία appella-
ri. Nam quatenus manus à facultate extenditur, κίνησις:
quatenus autem ab eadem immobilis servatur, ἀκίνησία di-

litur. Quiescit enim manus, facultatis eam sustentis operâ. Reliquæ verò duæ quietes, quarum una fit in παραλύσει, altera dùm sana manus super solidum aliquod reclinatur, nullo modo ad motum aptari queunt: cum sint omnimodæ quietes, omnique motu careant. Quemadmodum duo motus, convulsorius & voluntarius, nullo pacto ad immobilitatem referuntur: quod in illis nulla prorsus quies observetur. *Cap. 2.*

26. *Hæc de primo depravatorum motuum genere, Convulsione, sive σπασμῷ. Nunc de altero, quod τρόμος, Tremor appellatur. Cujus causæ priusquam explicentur, operæ pretium est, ut qualis motus sit, & quomodo fiat, cognoscatur. Cap. 2.*

27. Est autem motus compositus, & ex duobus motibus contrarijs conflatus, perinde ut manûs extensio. Ut enim hæc ex duobus æquè valentibus motibus constat; uno, qui fit à facultate, manum sursum attollente; altero, à gravitate, manum trahente deorsum; sic quoque tremor ex duobus motibus vicissim sibi succedentibus perficitur; uno, quo membrum à facultate attollitur; altero, quo idem ob gravitatem fertur deorsum. *Cap. 2.*

28. Etsi verò tremor & manûs extensio in eo conveniant, quod ambo ex duobus motibus cōstent: tamen etiam differunt, quod manu valente, adeoque extensâ persistente, facultas ne paululum quidem à gravitate vincatur: sed cum sit potentior ac validior inclinatione membri ad inferiora, tātum ipsum in sublime attollit sustinendo, quantū à gravitate deorsum trahitur. In tremore autem membrum deorsum labitur, facultate invitâ: ita ut pugna quædam inter facultatem & membri gravitatem existat. Nam facultas non permittit, ut membrum deorsum feratur, quemadmodum in παραλύσει: neq; gravitas membri concedit, ut facultas ipsum servet sublime, velut consueverat, dùm bene

benè valeret. Itaque in tremore nunc vincit facultas, cùm membrum attollit: nunc vincitur, cùm à gravitate trahitur deorsum, mutuóque sibi motus contrarij, sursum & deorsum, succedunt. Compositus quippe motus est, ut pulsus arteriarũ, qui ex διαστολῇ & συστολῇ cõstat. Discrimen autem est in eo, quoniam in pulsibus, (formicantibus tamẽ exceptis, qui sunt frequentissimi) est notabilis & sensu perceptibilis quies, quæ διαστολὴν à συστολῇ separat. In tremore quies vix percipitur: quoniam frequẽtissimus in eo est motus, ut præ nimia frequentia media quies internosci nequeat: non secus, ac in eo pulsu, qui formicans nominatur: cui proin rectè assimilari potest. *Cap. 2.*

39. Porro, quæri híc posset, utrum ἡ ὀρμὴ à tremore separari possit, necne? Hoc est, an tremor sine voluntatis impetu fieri queat? an verò motus sit à προαιρέσει, arbitrio & consilio nostro dependens? Ad hanc quæstionem nonnulli respondebant, tremorem sine ὀρμῇ, sine προαιρέσει, sine voluntatis nostræ arbitrio fieri: hoc moti argumẽto: quoniam videbant, caput interdum tremulo agitari motu, citra movendi voluntatem. Verùm *Galenus* eos erroris insinulat, quoniam ignorant, in servandâ aliquâ parte erectâ, tùm voluntatem agere, tùm à voluntate tendi musculos, qui sunt voluntarij motus ὄργανα, non secus ac in alijs motibus obeundis. Quare, licet caput citra voluntatem nostram tremat: tamen cùm in eo motu caput servetur erectum, certum est, voluntatem agere, ac tendere musculos, quorum tensione fit, ut caput non decidat, sed maneat erectum. Agit ergò in tremulis motibus voluntas & facultas: sed ob imbecillitatem partem immobilem servare nequit. *Cap. 2.*

30. Quòd autem voluntas in tremoribus agat, & quòd ob imbecillitatem partem immotam servare non valeat, *Galenus 7. περὶ κνησίου* planum facit: 1. desumptum est à capi-

te tremulo. Hoc enim si super molle aliquod corpus reclinaveris, non ampliùs tremere id videbis. Quid ita? Quia corpus istud motū capitis deorsum, qui fit à gravitate ejus, impedit, & imbecillæ facultati succurrit: quæ adjuta caput tandem servat immobile: I I. *à tremulâ manu;* dùm scilicet quis scribit, sciat, aut aliud quippiam agit. Tremere enim cessat, si ab operibus istis desistat. I I I. *à cruribus inter ambulandum tremmentibus:* quæ non tremunt, cùm quis ambulare cessat. I V. *à validis robustisq; juvenibus,* qui sub maximo onere, humeris imposito, cruribus tremunt. Ubi enim progredi desierunt, aut onus abjecerunt, à tremore liberantur. V. *ab ijs, qui per prærupta aliâq; loca ingredienti, præ timore cruribus tremunt.* Tremor enim vires deijcit. A tremore autem redduntur immunes, cùm itinere absoluto, timor excuritur. V I. *ab ijs, qui ob conspectum feræ alicujus immanis, tremuli redduntur.* Tremere namque desinunt, timore exempto. V I I. *ab illis, qui formidabilem Magistratum adeuntes perculsi toto corpore tremunt, & loqui jussi tremulam vocem edunt:* Cap. 2.

31. Hæc *τρεμήσια* evidenter declarant, tremorem à voluntatis impetu, seu voluntariâ facultate fieri, quæ tamē ob imbecillitatem gravitati membri, deorsum tendenti, resistere, & membrum perpetuò erectum servare nequit. Quare, inter facultatem & membri gravitatem assidua pugna est. Facultas quippe delapsū membrum iterum statim attollit: gravitas autem facit, ut rursū decidat: quoniā facultas ob imbecillitatem suam gravitati illius sufficienter resistere non potest. Cùm verò depressum membrum eo in situ non semper permaneat, sed à facultate rursū elevetur, necesse est, facultatem *πρὸς αὐτὴν* tūm aliquid agere. Nisi enim ageret, perpetuò membrum depressum jaceret. Quòd autem facultas tūm agens debilis sit, inde patet, quia si membrum alicui solido corpori incumbat &

inni-

innitatur, hâcque ratione facultati quasi ferantur suppetiæ, aut membrum ipsum à suâ actione defistat, tremor statim cessat: quod sanè non eveniret, nisi utrisq; inter se pugnantibus tremor excitaretur.

32. Notandum autem hîc est, causam, cur alij alio pondere plus minusvé afficiantur, esse, quoniam grave & leve eorum albo sunt, quæ *πρὸς τὸ* dicuntur, & ad vires referuntur. Idèoque quod uni grave est, alteri leve videtur. *Notandum è istud*: maximum onus validam vincere facultatem. Invalidam verò non solum à maximo: sed etiam à parvo prosterni. Quodsi eò debilitatis facultas pervenerit, ut jam concidere videatur, non impositas tantum sarcinas, quantumvis leves, videri graves: verùm etiam corpus proprium, ejusque partes, hominem, cui sic debilitata facultas est, gravare. Atque hoc tremoris pathemate senes omnes, cùm vehementiores actiones exercent, tentantur. Ijs enim partibus, quibus operantur, promptè tremunt. *Cap. 2.*

33. Cæterùm, causæ tremoris variæ sunt. I. *ψυχὸν πάλαι*, animi perturbatio, ut *timor*. Nam motricem facultatem debilitat. II. *νοσήματα τὴν δύναμιν βλάπτοντα*, morbi facultatem ledentes: & cum primis *δυσκρασίαι*. Id quod sequentibus probari potest argumentis. Etenim senectus, quæ intemperies quædam est frigida & sicca, tremore promptè corripitur. Ex junioribus verò tremuli fiunt, qui vehementer sunt refrigerati: aut multo vino meraco se impleverunt: aut magnam crudorum humorum copiam cõgesserunt: aut longo tempore nimiam ciborum copiam assumerunt: nec ullo tamen exercitij genere usi sunt: sed vitam in otio & ignaviâ traduxerunt. Sunt & qui frigidâ intempestivè haustâ tremuli facti sunt. Hæc enim omnia frigidam intemperiem efficiunt: eamque vel in corpore toto & nervorum principio, cerebro scil. spinalique medulla: vel in quibus-

dam duntaxat partibus, quæ naturâ cæteris sunt infirmiores, adeoq; ad subeundam noxam magis opportunæ. III. *παχῆς & γλίσχροι χυμοὶ, crassi lentiq; humores*, vias, per quas motrix facultas ad corporis partes derivatur, ita obstruentes, ut affluat parcior. Hoc autem tùm præcipuè accidit, cum vias illas planè obstruunt, & aliquas nervorum partes resolvunt. Tùm siquidem reliquæ fibræ, quæ nondum resolutæ sunt, musculum validè intendere nequeunt. Idcoque membrum ob gravitatē decidit, oriturq; inter hanc & facultatem pugna quædam, & cōsequenter tremulus motus. Quodsi tamen humores dicti, qui vias facultatis per nervos obstruunt, nondum omninò impacti sint, sed per facultatem violenter in has vias irruentem adhuc concuti & commoveri possint, tùm membrum perinde movetur, ac in *παράλυσει* incipiente. Nam per facultatis incurSIONES excutiuntur humores, qui nervos obstruunt, & membrum movetur. Rursus autem humoribus, qui excussi sunt, in priorem locum confluentibus, delabitur, jacetque immotum: donec iterum facultas conferri irrucens, humores, qui meatus, sive vias illius occupaverunt, dissipaverit. *Cap. 2.*

34. *Tertium depravati motus generis παλμὸς est, Palpitatio: barbaris jectigatio: alijs saltus.* Est autem palpitatio *διαστολὴ παρὰ φύσιν*, dilatatio præter naturam. Fit enim in omnibus corporis partibus, quæ dilatari possunt. Quæ dilatari nequeunt, ut ossa, & cartilagines, nunquam palpitant. Observatur sæpius in cute: aliquândo & in subjectis illi musculis. Non rarò etiam in ventriculo, vesicâ, utero, intestinis, hepate, liene, diaphragmate: in summâ, in omnibus partibus, quæ dilatari possunt, deprehēditur; adeò quidem, ut etiam in corde & arterijs cernatur. Nam præter pulsus, qui cordi & arterijs secundum naturam inest, alius nonnunquam in illis depravatus motus videtur, cùm scil. p. n. dilatantur: & is motus *παλμὸς* appellatur. *Cap. 2.* 35. Ex

35. Ex quo liquet, palpitationem non esse proprium πάθος προαιρείκης δυνάμεως, neq; προαιρείκων ὀργάνων, ut tremorem & convulsionem: sed, ut jam dictum, πάθος commune omnibus illis partibus, quæ dilatari possunt; quales sunt, quæ molles existunt. Hæ enim dilatari & in altum attolli, rursusq; confidere queunt. *Cap. 2.*

36. Causa παλμῆ investigatur ex ijs, quæ manifestissimè apparent: nimirum ex palpitationibus palpebrarum, superciliorum, frontis & genarum. In illis enim cutis, & attolli, & dilatari conspicitur, & quidem ad eum modum, quo arterias dilatari cernimus. *Cap. 2.*

37. Antequam verò ad explanationem causæ palpitationis accedamus, decidenda quæstio est, num arteriæ, & aliæ partes à se ipsis dilatentur, & dilatata id, quod eas implet, ad se convellant, quemadmodum folles fabiarum, quos constat, non ob id dilatari, quòd spiritu pleni sint: sed quia distenduntur, idèò impleri: an utrum ritu, quia plenæ sint, dilatentur? Videtur autem quæstio de dilatatione partium palpitantium genere similis esse quæstioni de arterijs. Utrobique enim quæritur, cur pulsent? Facilitate tamen inventionis ei, quæ de arterijs *inquiri*, dissimilis est. *Cap. 2.*

38. Neque enim consentaneum est, partibus, quæ palpitant, perinde atq; arterijs, quæ semper, & secundum naturam pulsant, facultatem quandam insitam esse. Si enim illis insita esset, semper, velut arterijs, ineffet, & maximè, cùm essent sanæ. Cùm verò neque semper, neq; cùm sanæ sunt, palpitatione ijs insit: perspicuum est, illas à se ipsis minimè dilatari. Si verò non à seipsis dilatantur, necesse est, ut dilatentur ab aliquâ substantiâ, quæ in ipsas influat. Hæc autem, vel humor est, vel vapor. At humorem non esse, celeritas generatiōis & solutionis τῆ παλμῆ monstrat. Nam & celeriter fit, & statim desinit. Nullus autem humor adeò celeri-

celeriter influere potest, multoq; minùs recedere, præsertim ijs in faciei partibus, ubi nudis propemodùm ossibus cutis supertenditur. Itaque necesse est, efficientem palpitationis causam esse substantiam quandam aëream: non paucam tamen, neque tenuem. Talis enim facilè transit. Est igitur, & παχυμερής, partium crassarum: & ατμάδης, vaporosa: & τὸ πλῆθος αὐτῆς, ἀξιόλογον, quantitate effatu digna: nempe pro capto spatij, in quo continetur. Proinde dilatat, attollit, & inflat partem, cui est inclusa, quo ad trussum, & pulsa, in cognatum sibi aërem exhalet. Id quod etiam in bullis fieri videmus, quæ in liquoribus, cùm coquuntur, oriuntur. Hæ enim etiam tantisper durant, donec in cognatum sibi aërem abeant. Differunt tamen in hoc à partibus palpitantibus, quòd hæ non rumpantur, ut bullæ, sed integræ mancant. Cap. 2.

39. Quodsi quærat, quibusnam partibus maximè accidere παλμοὶ soleant? Respondet *Galenus*, ijs, quæ quomodolibet sunt refrigeratæ. Nam quod animali, cùm secundum naturam se haberet, & sanum esset, à συμφύτῳ θερμῷ attenuatum & exactè elaboratum per ἀδελον διαπνοῇ quotidie è corpore defluebat: id ab eodē θερμῷ propter refrigerationem imbecilliore reddito, adeoque non ampliùs attenuare, & exquisitè elaborare valente, ατμωδέστερον vaporosius, & παχυμερέστερον, & crassius evadit. Quapropter, non ita facilè, ut antea, transpirat: sed sub cute detinetur, & in transitu, ob constipationē à frigore factam, moratur, & nō egreditur. Hócq; accidit magis, si cutis ipsa fuerit densior. Sic enim duplex remoræ causa concurrit: una, ἡ στεγνότης τῶν ὁδῶν, viarum, per quas vapor ille transire debet, angustia: altera, τὸ πάχος τῆς διαρρέουσας ὑγίας, crassities fluentis substantiæ vaporosæ. Itaq; concluso intùs vapore crasso, dilatatur & attollitur cutis: eodémq; modo etiam musculi moventur, quando in ipsis huiusmodi excrementum colli-

colligitur: adeò quidem, ut palpitantes totum quandoque membrum unà attollant. *Cap. 2.*

40. Cæterum, motus palpitationis, & à convulsione, & à tremore, & à rigore differt. *A convulsione*: quoniam hæc membrum omninò extendit, aut flectit. At in *παλμῶ* membrum *ἀξιολόγως*, notabiliter, neque flectitur, neq; extenditur: sed duntaxat concutitur, seu agitur aliquo modo, donec musculus palpitare desinat: ad eum modū factō motu, quo in tremore: membro scil: dilatato, & in altum sublatο, ac rursū confidente atque depresso. *Cap. 2.*

41. *A tremore* dupliciter: I. quoniam *παλμὸς* per majora temporis intervalla fit: tremor per minora. Nam intervalla, quæ intercedunt inter duas palpitationes, longiora sunt: quæ inter duos tremulos motus, breviora. II. quia *παλμὸς* motus est præter naturam, & quidem totus, quantus. Excitatus enim est à causâ præter naturam. Tremor mixtus est motus. Componitur quippe ex motibus duobus, ut suprà dictum: uno facultatis, qui est *τὰτὰ φύσιν*, membrūque attollit: altero morbi, qui est *παρὰ φύσιν*, & membrum deprimat. *Convenit tamen παλμὸς cum tremore in eo*, quia æquè, ac tremor, attollendo & deprimendo perficitur. Videmus enim palpitantem musculum, ubi justæ magnitudinis fuerit, totum subinde membrum inter dilatandum unà secum attollere: & contrà, cū contrahitur, subsidet, perinde, ac si membrum esset *ἀψυχον*, sinere, ut membrum deorsum feratur. *Cap. 2.*

42. *A rigore* itidem dupliciter distat: I. quia motus palpitationis paucus est, tardus, & rarus: rigoris contrà multus, celer, ac densus. *Πολὺς*, *multus* vocatur, propter motionum numerum. Una quippè alteram statim excipit. *Ταχὺς*, *celer*, ob motionum impetum citum. Brevi namque tempore motus finitur. *Πυκνὸς*, *densus*, seu *frequens*; quòd in eo breve sit quietis tempus. II. quia *παλμὸς* totus

est *παρὰ φύσιν*: rigor nequaquam: sed mixtus motus, sicut & tremor. Nam in eo, & causâ præter naturam, v.g. excrementum acre, sentientes partes vellicans, & facultas expultrix movet. Hæc enim conatur expellere quod sibi molestum & infestum sentit. Plus tamen in rigore facultatis est, quàm in tremore. Imò, si verum dicere oportet, universus motus, qui in rigore observatur, insitæ illius facultatis est, quam *ἐκκριτικὴν* & *ἀποκριτικὴν* nominare solemus. Causâ verò, quæ eam impellit, &, ut violenter moveat, urget, *παρὰ φύσιν* est. *Cap. 2.*

43. Existere autem reverà talem aliquam facultatem *ἐκκριτικὴν*, multarum partium exemplo, ac cum primis Uteri, Ventriculi, Pectoris, Pulmonis & Cerebri demonstrari potest.

44. Nemo enim est, qui ignoret, Uterum, simulac novem mensibus foetus gravitatem, & suam ipsius distentionem sustinuit, hocq; toto tempore osculum ita exquisitè clausum habuit, ut ne quidē specilli mucronem admiserit, absoluto foetu, cervicem ad eò aperire, ut foetus promptè atque expeditè egredi possit. Constat prætereà, tunicas ejusdem, quæ prius erant distentæ, contrahi, foetumq; expellere. Dubium ergò nullum, quin in utero facultas sit *ἐκκριτικὴ*, quæ absolutis 9. mensibus foetum extrudat. *Cap. 3.*

45. Eadem hæc facultas, ubi foetus corrumpitur, uteri cervicem haud secus, ac partus tempore recludit, conceptumq; mense tertio, quarto, aliòve eijcit. Neque enim claudendi & aperiendi uteri tempus ita præfinitum est, ut habeat certum aliquem temporis circuitum: sed utrumque sit, prout usus occasio postulat. *Cap. 3.*

46. Hanc *ἐκκριτικὴν* facultatem etiam Ventriculus palam facit. Is enim post cibi ingestionem orificium inferius claudit, nihilque egredi sinit, priusquàm plenè sit concoctum: dummodò nil sit, quod *πέψιν* interrumpat. Eadem enim

enim hîc ratio est, quæ in utero. Nam quemadmodum ἡ τῶν ἐμβρυῶν διαφθορά facit, ut uterus 9. mensibus clausus non permaneat: sed se aperiat citiùs, & foetum ante tempus excutiat: sic quoque ventriculus, si vel cibi in ipso fuerint corrupti: vel vitiosi, cùm assumerentur, extiterint: vel modum in quantitate excefferint, præmaturè se pandit, & quod in ipso innatat, per vomitum eijcit: quod verò ad inferiora repit, per pylorum expellit. Neque verò cibum tantùm, in qualitate, aut quantitate peccantem, vis ventriculi ἐκκρίσκει eliminat: sed etiam ad expulsionem insurgit, ubi à bile, pituitâ pravâ, sanie, aliové hujusmodi humore fuerit infectatus. *Cap.3.*

47. Sed & Pectus ac Pulmo satis confirmant, esse in corpore facultatem expultricem, eamq; per tussim eijcere ea, quæ sibi molesta sunt. Ut enim ventriculus per vomitum ea exturbat, quæ sibi inimica sunt: sic thorax & pulmo per tussim noxia excernunt. *Cap.3.*

48. Esse verò hanc facultatem innatam, hinc constat: quia nullum animal, aut vomere, aut tussire didicit. Nam postquam in lucem editum est, & longo tempore inculpata sanitate usum, neque unquam, aut vomitum, aut tussim expertum; tamen si causa aliqua adsit, quæ vel orificio ventriculi, vel respirationis vijs molestiam pariat, protinùs certè animal, à nullo edoctum Magistro, vomit, & tussit. *Cap.3.*

49. Movetur autem ventriculus in vomitu perinde, ac uterus in partu. In tussi verò alia motûs ratio est. Nam, ut *l.3. de nat. fac.* docetur, uterus, cùm foetum excludere satagit, internum orificium diducit; fundum verò, quàm potest proximè versus os contrahit. Sic quando ventriculus noxia expellere studet, similiter orificium, aut sinistrum, aut dextrum, aperit: proprium verò corpus validè constringit. In tussi verò motus longè aliter fieri solet. Pulmo enim ejusmodi motu contractionis moveri nequit,

ut, quod alienum est, excernat. Aspera siquidem arteria, per quam necesse est ea, quæ pulmonem infestant, expelli, cartilaginea est & dura: nec circa illa, quæ continet, cōtrahi potest. Ideoq; sagax natura aliud auxilium invenit: nempe σφοδρὸν τινα τῆς πνεύματι ἐξω φερὰν, lationem quandā spiritus vehementem ad exteriora, quam βῆχα, *Tussim* nuncupant. *Cap. 3.*

50. Eiusdem generis est etiam πταρμός, *sternutatio*, quæ expellere solet ea, quæ in naribus continentur. Atqui & nares respirationis vias esse natura voluit. Spiritus quippe per nares vehementer ac violenter delatus, ea, quæ illic molesta sunt, extrudit, viasque sibi ipsi expurgat, perinde ut artifices, qui in tibus ac fistulas βιάως ἢ σφοδρῶς inspirantes, eas à pulvere & sordibus liberant. *Cap. 3.*

51. Quæres, si motus prædicti, vomitus, tussis, & sternutatio facultatis sunt adminiculo, ac propterea ἔργα φύσεως, opera naturæ sunt, cur ergò hic symptomatibus, quæ παθήματα sunt, & affectus præter naturam, adnumerentur? Respondet *Galenus*, ijs adnumerari διὰ τὰς ἀναγκάζουσας αὐτῶ κινῆσθαι τὴν φύσιν αἰτίας, quod causæ, quæ naturam, facultatemvé ad motus hosce cogunt atq; impellunt, præter naturam sint. *Cap. 3.*

52. Cæterùm, motus expultricis facultatis in intestinis, utero & vesicâ similes sunt, sive quid secundum naturam, sive præter naturam expellatur. Neq; enim intestina, uterus & vesicâ alio motû genere utuntur, cùm superflua naturalia excernunt, quàm cùm quæ præter naturam sunt propulsant. Ideoque fit, ut motus, qui symptomata sunt, à motibus secundum naturam manifestè distincti non sint. *Cap. 3.*

53. At cum illa, quæ per τενασμὸς, δυσεντερίας, λευτερίας, τραγγηρίας, ἢ εἰς ἕρα διάρροϊαν, hoc est, diabeten, profligantur, manifestè sint præter naturam, ideò meritò pro symptomatibus

ptomatibus habentur, ex numero scil. eorum, quæ immo-
dicè excernuntur. Pari ratione inter symptomata recen-
seri debent ἡ ψοφώδης φύσσα, strepens flatus, h. e. flatus, si-
ve spiritus per sedē cum strepitu eiectus: καὶ ὁ τρεσμός, stridor,
sive dejectio, sonum inter egerendum stridētem excitans:
καὶ ἡ ἐρύγη, ructus, καὶ ὁ βορβορυγμός, murmurillum, h. e. spiritus
intus fluctuans, nec emissus, aliáque id genus, de quibus
libro sequenti dicetur. *Cap. 3.*

54. Verùm, in ventriculi excretionibus manifestius est
id, quod per vomitū, quàm quod per inferiora expellitur.
Nam per inferiora non solum quæ p. n. verùm etiam se-
cundum naturam sunt, ventriculus expellit. Itaq; an ex
symptomatum genere sint? facilè sciri nequit. Per vomitū
autem non nisi ea, quæ præter naturam sunt, ventricu-
lus eijcit. Ideoq; multi vomitum non ἔργον φύσεως, sed σύμ-
πτωμα potius judicârunt: decepti in eo, quod inter ἔργα φύ-
σεως simpliciter dicta, & inter ἔργα φύσεως βιάως ἀναγκαζο-
μένης κινῆσθαι πρὸς τινὲς αὐτῶν νοσερεῖν, minimè distinxerint.
Est enim σύμπτωμα quidem: sed tamen etiam ἔργον φύσεως,
ἡ δυνάμειως ἐκκρίτικῆς: verùm à causâ aliquâ morbosâ ad mo-
vendum coacta. *Cap. 4.*

55. Ad eundem modum, si tussim & sternutationem
inter se conferas, tussini manifestius apparet παρὰ φύσιν es-
se, quàm sternutationem. Quod enim tussi expellitur, ma-
nifestius est, quàm quod per sternutationem exploditur.
Utcunque autem ex jam dictis motibus unus altero mani-
festius παρὰ φύσιν esse videatur, omnes tamen ex illo sunt
symptomatū genere, in quo causa aliqua præter naturam
ad hujusmodi actiones naturam stimulat atque irritat.
Cap. 4.

56. Modus autem motionis in hisce symptomatibus i-
dem non est: neque ab unâ eadēque omninò facultate
omnia proficiuntur. Id quod manifestum erit, si motus

uteri, intestinorum, ventriculi, vesicæ, pulmonum, thoracis & cerebri contemlemur. *Cap. 4.*

57. Etenim, quæ ab utero, intestinis, ventriculo, ac vesicâ excernuntur, ea à partibus hæc circumdantur. Contrahunt enim sese partes istæ, seseque contrahendo, quicquid inimicum est, explodunt: haud secus, ac manus, cum aliquid exprimere conantur. Facultas verò, hunc motum efficiens, una est ex 4. naturalibus, & ἐκκρετική, expultrix appellatur. *Cap. 4.*

58. Alia species motûs, aliudque principium movens est, cum aliquid in asperâ arteriâ continetur. Hæc enim dura & cartilaginea cum sit, contrahi non potest, ut ventriculus, vesica, uterus & intestina: ideoq; natura vehementem spiritûs ad exteriora lationem instituit, & tussim movet, ut excutiat, quod molestiam creat. Hæc autem fieri solet per eadem ὄργανα, per quæ magnæ simul & vehementes expirationes perficiuntur, quas ἐκφύσησις, exufflationes, vocât: adeò ut tussis nil sit aliud, quàm σφοδρότης τις ἐκφύσησις, vehementissima exufflatio, quâ plurimus simul celerrimèq; foras latus spiritus suo impetu, quæ vias asperæ arteriæ obstruunt, extrudit. Quod si primâ ejectione, quæ molestant, propellere nequit, bis térque in ea irruere minimè gravatur: magnâque ex parte finem consequitur, ubi spiritus vehementer movetur, & ea, quæ obstruunt, ad propellendâ apta sunt atq; idonea. Talia autem sunt, quæ neq; nimis tenuia sunt & aquosa: neq; crassa valde atq; glutinosa. Illa enim ob tenuitatem à spiritu potius dissecantur, quàm ultra feruntur. Hæc verò arteriæ asperæ adeò inhærent tenaciter, ut difficulter ab eâ separentur. Itaq; ad glutinosos humores excernendos vehementissimis ac validissimis tussibus opus est, quæ violentiâ quadam quod affligit expellant. *Cap. 4.*

59 *Sternutatio* humores, qui difficulter solvuntur, & asperæ

asperæ arteriæ firmiter adherent, magis expedit, quàm tussis. Fit enim validiore ac vehementiore spiritûs impetu. Sed generationis suæ causam habet aliam: nimirum eam, quæ naribus molestiam infert. *Tussis* enim ab illâ excitatur, quæ asperam arteriam, pulmonem & thoracem infestat. Excernit tamen sternutatio propter vehementiorem spiritûs erumpentis impetum non solum ea, quæ in prioribus cerebri ventriculis continentur superflua: verum illa quoque, quæ asperam arteriam vexant. Atq; hæc est causa, quod *sternutatio* capiti vaporibus oppleto maximû adferat præsidium. Eos enim excutit, & caput ab obstructiõne liberat, nisi à destillatione proveniat. Tùm quippe indicium potiùs est capitis ab humoribus oppleti: & quia caput frequenter ac vehementer concutit, illud potiùs lædit, quàm juvat. *Tussis* capiti nil confert. Nil enim inde vacuat: imò potiùs concutiendo offendit. Non mirum autem, spiritum per sternutationes uno impetu, & ex pulmone, & ex capite emitti. Ostensum enim *libr. de muscul.* cerebrum thoraci per nervos motum communicare; thoracem verò pulmonem dilatare & contrahere. Quapropter, cùm vis cerebri expultrix insurgit, ut quæ naribus inimica sunt, expellat, utraq; expirationis viâ simul utitur: alterâ, quæ fit per nares; quam cerebrum per se ipsum molitur: alterâ per nervos, veluti per longas manus, ad thoracem usq; pertinentes, quibus eam dilatat & contrahit. Per ossa verò ἠθμοειδῆ, colatoria, vaporosum spiritum emittit. *Cap. 4.*

60. *Hætenus de symptomatibus προαιρετικῆς tantum διδόμεως*, voluntariæ facultatis. *Vomitus* autem, qui illis est ἀνάλογος, naturalis facultatis symptoma est. Ut verò vomitum præcedit nausea: ita tussim κέρχον, irritamentum ad tussendum. Et quemadmodum nonnulli nausê afficiuntur, nec tamen vomunt: ita quidam irritamentum ad tussendum sentiunt, nec tussunt tamen: idque διὰ σμικρότητι.

κρότης τῆς αἰτίας. Sæpè enim ob levem & exiguam faucium asperitatem: interdum verò ob tenuem quendam, eúmque paucum humorem, irritamentum ad tussendum accidit: neque tamen tussis sequitur. *Cap. 4.*

61. Est verò *tussis causa* in genere una: nempè quicquid spiritum intercipere potest: in specie autem varia & multiplex. I. ὑγρὸν καὶ φερόμενον ἀπὸ τῆς κεφαλῆς, humor à capite destillans: quemadmodum evenit in catarrhis. II. αἰθροζόμενόν τι κατὰ τὰς τραχείας ἀρτηρίας, quiddam, quod in arteriâ asperâ collectum: veluti contingit in peripnevmoniâ, pleuritide, gibbarum hepatis partium inflammatione, faucium asperitate. III. πινόντων ἢ ἐσθιονόντων τι παρεμπίπτειν, cum aliquid esculentorum, aut potulentorum in asperam delabitur arteriam. Hoc enim ἀνάλογον est τοῖς ἀπὸ κεφαλῆς κατὰ ῥοαίς, destillationibus à capite. IV. δυσκρασία τῶν ὀργάνων τῆς ἀναπνοῆς, intemperies instrumentorum, quæ respiratori inerviunt; eaque frigida. Ejusmodi tussis sicca est, in quâ nihil expuitur. Neque violenta est: sed exigua, ut vel omninò, vel magnâ ex parte, ne fiat, prohiberi queat. Tussis enim violentæ κατὰ λήψιν πνεύματος, spiritûs detentione, minimè vincuntur: sed majores sunt vehementioresque, quàm ut hac ratione supprimi possint. Supprimi autem possunt, & etiam sanari spiritûs cohibitione tusses ab intemperie frigidâ natæ, si non sint magnæ. Causa est: quia in spiritûs cohibitione musculos thoracis & abdominis contrahimus atque intendimus vehementer, adeò ut neque inspiremus, neque expiremus. Impeditâ autem respiracione, calor in instrumentis respiratorijs augetur, spiritûsque sub thorace violèter pressus in omnes angustos meatus penetrat. Itaque calefactis istis instrumentis, frigida intemperies corrigitur: omniâque ad æqualitatem prioris temperamenti redeunt. *Cap. 4.*

62. Inæquales enim intemperies tusses movent. Causa
cogno.

cognoscetur, si in memoriam nobis revocaverimus, duplicem esse intemperiem: unam, quæ à nudâ qualitate calidâ, frigidâ, humidâ, aut siccâ, eâque vel simplici, vel compositâ, proficiscitur. Alteram, quæ sit cum affluxu alicujus humoris, qualitatibus istis præditi, qui instar roris per partes est dispersus. Hinc enim perspicitur, τὴν ἑστίαν τῆς δυσκρασίας, vel in nudâ qualitate, vel in qualitate cum affluxu humoris sitam esse. Et utramque rursus duplicem: unam ὁμαλὴν, æqualem, quæ æqualiter partes corporis occupat: alteram ἀνῶμαλον, inæqualem, quæ non æqualiter partibus inest. *Cap. 5.*

63. Ὅμαλὴ δυσκρασία sine dolore est. Testantur hoc febres hecticæ, & plurimi affectus frigidi, qui æqualiter partes occupant. Probat idem & ratio. Fit enim hujusmodi intemperies cuilibet sic affectæ parti, οἷον φύσις ἐπὶ κίηται, velut acquisitiva natura. At nullum corpus à natura suâ infestatur. Scribit namq; Hippocrates, dolores fieri, cùm natura corporum mutatur ac corrumpitur: non cùm jam mutata est atque corrupta. *Cap. 5.*

64. Ἀνῶματος verò δυσκρασία dolorem infert, & quidem tantum, quanta ejus est magnitudo. Id quod in acutissimis & vehemētissimis febribus experiri licet: in quibus solidæ animalis particulæ dolent, dùm à calore p. n. nostram mutantur & alterantur. *Cap. 5.*

65. Ex his perspicuum est, cur ἀνῶματος δυσκρασία tussim excitet? Infert enim sensum molestiæ: eò quod organorum respiratoriorum temperiem mutet, alteret atq; corrumpat. Natura ergò cupiens expellere id, quod hanc molestiam inducit, tussim movet.

66. Hæc de causis tussis. Nunc de horrore & rigore: si prius duæ molesti sensus species, horrorem & rigorem antecedentes, ἀνωμαλία scilicet καὶ κόπαι, sive lassitudo, fuerint enarratæ.

57. Est autem ἀνωμαλία molestæ cujuscumque rei in nobis sensus, quo à nostrâ nos excidisse naturâ conjicere possumus. Tùm enim quippiam in corpore nostro sentimus, quod à naturâ nostrâ prorsus est alienum, quod tamen satis explicare & verbis exprimere non valemus. Hanc verò ἀνωμαλίαν homines incipientibus jam in orbis, priusquam v. g. febricitent, per totam corporis molem sentiunt. Neque ullus adeò fortunatus fuit, qui non aliquando symptoma te isto fuerit correptus. *Cap. 5.*

58. Cæterum, ἀλλότριον id, quod per totam corporis molem dispersum sentitur, interdum videtur esse ὑποθερμόν τι, subcalidum: aliquando δακνώδες ἄνευ τῆς θερμαίνεω, mordax citra calorem: nonnunquam ἀμφω πεπονηός, utroque modo affectum, calidum scil. & mordax: aliàs citra calorem & mordacitatē διατείνειν ἀπάσας τὰς σάρκας, carnes omnes leviter distendit. In omnibus verò hisce symptomatibus, homines ἀνωμαλίαν quandam se sentire ajunt, & pandiculantur, omnesque partes naturali quodam instinctu facultatis expultricis, quæ ea, quæ corpori molesta sunt, expurgare conatur, quæque singulis ejus partibus, ut ferventur, & in vita permaneant, à naturâ est concessâ, distenduntur. *Cap. 5.*

59. Pandiculantur autem & distenduntur maximè à somno: quia tùm præcipuè halituosa excrementa in carnibus sentiunt. Hæc verò tùm sentiunt duplici de causa: I. propter nutrimenti concoctionē, quâ peractâ, excrementa ab utili humorum massâ separantur. II. propter horum motuum intermissionē. Animales quippe actiones somni tempore quiescunt. Experrecti ergò halituosorum excrementorum, sive flatulentorum spirituum copiam sentientes, eam à se pandiculatione excutere satagunt. Id quod etiam pueruli, qui adhuc in cunis jacent, à nullo edocti Magistro, faciunt. Ipsa namque natura ad pandiculationis motum

tū animalia impellit, cū halitibus ac vaporibus διαπνοήν, perspiratum, molitur. *Cap. 5.*

70. Altera molesti sensus species est κοπώδης διάθεσις, *lassitudo*: quæ duplex est: una αὐτόμαλτος, *spontanea*, quæ sine corporis motu & exercitio accidit: altera *non spontanea*, quæ motum corporis sequitur. *Cap. 5.*

71. Utraque rursus triplex est: I. τονώδης, *tensiva*: in quâ tota corporis moles tendi putatur: oriturque à πλεθώρα, quæ partes, quibus inest, ita distendit, ut eam sine molestiâ ferre nequeant. II. ἐλκώδης, *ulcerosa*, in quâ corpus, cū movetur, velut ulceribus conspersum esse putatur. Provenit ab humore mordaci: ideóq; cū exerceimur, (per quietem enim talis humor minùs est molestus, quàm per motum: eo quòd hic illum agitet acriorémq; reddat) arbitramur, nos pungi, quasi plures spinæ nobis essent infixæ. III. φλεγμονώδης, in quâ corpus conquassatum, & contusum, & quasi phlegmone obfessum esse putatur. Eâ laborantes, σεῶσκόπω, ossium lassitudine, detineri ajunt: & ne minimum quidem motum sustinent: ideóque nemo eorum pandiculi tentat: ut qui omnem motum reformident. Sentiant tamen calorem manifestum, & τένσιν, *tensionem*, & δήξιν, *mordicationem*: idque propterea, quoniam κακοχυμία in totam corporis molem liberaliter est effusa. In reliquis verò duabus lassitudinibus, ulcerosâ & tensivâ, pandiculationis interdum motus observatur: cū scilicet vel exiguæ fuerint: vel ex flatuosis ac vaporosis excrementis genitæ. *Cap. 5.*

72. Tribus lassitudinum speciebus propositis, sciendum, lassitudinem ulcerosam, ubi increverit, adeò, ut qui eâ laborant, nullum sustineant motum, sed velut ulceris dolorem sentiant, in φρίκην, *horrorem* transire: eum nimirum affectum, quo cutis inæqualiter movetur ac concutitur, reliquo corpore immoto. Horroris autem vitium, ubi mo-

tus accesserit, in *ρίγ* & rigorem mutari : qui est inæqualis totius corporis concussio. *Cap. 5.*

73. Conveniunt autem inter se *ἀνωμαλία*, *κόπος* ἐλκώδης, *Φρίκη* & *ρίγ* & quod ab unâ eadēmq; causâ, nempe ab acris & mordacibus humoribus proveniant. Differunt verò inter se quadrifariam. I. τῷ πλήθει τῶν περιττωμάτων, excrementorum multitudine. Multa enim paucis magis molestant. II. τῇ κινήσει, motu. Excrementa namque quæ moventur, gravius affligunt, quàm quæ quiescunt. III. τῷ ὅτι μὲν μάλλον εἶναι δακνῶδη, ὅτι δὲ ἤττον, acrimonia & mordacitate : quia alia excrementa magis, alia minùs acris sunt & mordacia. Ex quibus illa magis, hæc minus mordent. IV. τῷ τὸ σῶμα τὸ κάμνον ἢ δυσπαθές, ἢ εὐπαθές, ἢ ἀσθενές, ἢ ἰσχυρόν, ἢ ἐλαστόηλον, ἢ δυσἀσθῆλον εἶναι φύσει, diversitate corporis laborantis, quod vel facilè, aut difficulter patitur : adhæc, vel validum est atque robustum, aut debile & infirmum : deniq; vel exquisitum, aut hebetiori sensu præditum. Etenim corpus *δυσπαθές*, *ισχυρόν* & *δυσἀσθῆλον*, non nisi à vehementi infestatur causâ. Contrà *εὐπαθές*, *ἀσθενές* & *ἐλαστόηλον* à levissimâ infestari solet. *Cap. 5.*

74. Pro harum igitur causarum varietate, varia symptomata generantur : in alijs scilicet *ἀνωμαλία* : in alijs *horror* : in alijs *rigor* : in alijs *lassitudo ulcerosa*. Levior quippe affectus est, *ἀνωμαλία* : gravior, *horror* : gravissimus, *rigor*. Leviores ergò causæ, præsertim si quieverint, *ἀνωμαλίαν* producant : graviores, si fuerint motæ, sed remissius, *horrorem* generant : gravissimæ, *rigorem* inducunt : præcipuè ubi celeriter vehementerque fuerint motæ. Motum enim plurimum hîc momenti habere, praxis & experientia monstrât. Praxis : quia Medici ijs, qui lassitudine ulcerosa laborant, præcipiunt, ut quiescant. Experientia : quoniam *Galenus* observavit, quosdam, quî crudorum humorum copiam collectam habuerant, ubi quievissent, nil perpessus esse : cum

verò

verò balneum essent ingressi, vel in Sole stetissent, horruis-
se: idque multò magis, si etiam se exercitassent. Acrida e-
nim mordaciâque excrementa tam ab externis, quàm ab
internis causis ad motum excitantur. *Externe* sunt, Sol,
balneum, exercitatio, ira. *Interna* ea omnia, quæ excre-
menta hæc vel calefaciunt, vel attenuant, vel in flatum con-
vertunt. Alterant enim. At alteratio motus est species.

Cap. 5.

75. Esse autem causam motam molestiorem, magisque
quiescente infestare, *Galenus* duobus modis probat. I. ex-
emplo durorum corporum, quæ incidunt in oculos. Ijs e-
nim super oculos delapsis, si palpebræ claudantur, & oculi
quiescant, aut parùm, aut nihil doloris adferunt. Sin utra-
que pars crebrò moveatur, dolorem pariunt toleratu diffi-
cilem. II. Ex ipsâ rei naturâ. Nam dùm quiescit causa,
consuetudine quâdam membro, in quo continetur, fit fa-
miliaris: ideòq; minùs afficit. Ubi verò moveretur & agita-
tur, & in partes sensibiles, quales oculi sunt, impetuosè fer-
tur, illos dolore cruciat. Hinc est, quòd humores, qui per
venas & arterias, partes insensibiles, fluunt, nullum rigorem
excitent: Ubi verò è venis ad sensibiles corporis partes, car-
nem scilicet totumque corporis habitum, effusi sunt, perque
illas violenter aguntur, & ad cutem feruntur, in ipso transi-
tu eas stimulent, pungant, dividant & vulnerent. Cap. 5.

76. Cæterum, quòd omnis mordax & mota causa, sive
calidissima, sive frigidissima fuerit, animalis, & horrorem, &
rigorem incutiat, multis probari potest indicijs. I. quia vi-
demus, aquam ferventem sano corpori de repente asper-
sam, aut scintillam ignis incusam, horrorem excitare. II.
quia experimur, medicamentum καυσικόν exulceratis par-
tibus impositum, primùm quidem horrorem: deinde ri-
gorem: & in quibusdam etiam, qui sunt calidiores, graci-
liores, & accuratiore sensu præditi, febrim parere. III. quia

constat, tertianas febres omnium maximè hortidas esse, & quòd & biliosissimæ sint, & calidissimæ. Quò autem sunt exquisitiores, èd etiam rigor in illis est vehementior. I V. quia Hippocrates docet aphor. 58. f. 4. καύσας laboranti rigorem supervenientem febrem solvere. Quid ita? Quia bilis, quæ antea in venis hinc inde errabat, à naturâ per carnes, partes valdè sensiles, ad cutem κρῖναις propellitur: ita ut rigor iste simul symptomata sit & signum. Symptoma: quoniam bilis motum per loca sentientia sequitur. Signū: quòd istum bilis motum patefaciat. Nam qui huiusmodi rigore corripiuntur, sudant, vacuatq; bile à febre liberantur. Quod si bilis non ad exteriora, ipsam scilicet cutē, sed ad internas corporis partes feratur, tūm aut per vomitum, aut per alvum excernitur. Accidit autem sæpè, ut bilis, & intrò, & foràs, eādē die moveatur: & per vomitum, sudorem, atque alvum expurgetur. Cap. 5.

77. Quidam, cū viderent, corpus per rigorem vehementer frigere, credebant, illum salutare καύσας remediū esse. Τὰ γὰρ ἐναντία τῶν ἐναντίων εἶναι ἰάματα. Verūm, Galenus totā illos viā errare dicit. Nam si rigor, veluti remedium contrarium, καύσας sanaret, certè, quacunque fieri posset ratione, rigorem in eo excitare liceret: nimirū frigidā aquā, vel aspersionē, vel affusā: aut ægro ipso in frigidum delato aërem: aut in frigidæ aquæ solum demisso. At quāvis hac ratione rigor excitetur, καύσας tamen minimè curatur. Deinde, si rigor καύσας sanaret propterea, quòd corpus refrigeraret, utique homo post rigorem febricitare statim desineret. At hoc non fit. Ergò rigor ut contrarium non sanat καύσας. Minor probatur: quia videmus, hominem, rigore finito, multò vehementius, quā antea, febricitare. Ratio est: quoniam à rigore major excitatur calor: idque propter vehementiorem bilis motum. Tūm demū verò cessat καύσας, cū febricitans, vel largiter sudavit: vel flavam bilem

lem vomuit : vel eandem per intestina deiecit. *Cap. 5.*

78. Quæri autem non immeritò posset, cum antea dictum sit, rigorem, & à calidâ, & à frigidâ causâ proficisci, cur idem πάθημα à contrarijs causis excitetur? Respondet *Galenus*, sciri hoc posse, si meminerimus, quid facultas expultrix præstare soleat? Nam non solum ea excrementa expellit, quæ in amplis organorum spatijs, v. g. ventriculo, utero, utraque vesica, intestinis, bronchijs pulmonum, & naribus continentur: verum etiam illa, quæ in membrorum substantia nascuntur: idque modis diversis. Prioris enim ordinis excrementa expellit ἀσθητικῶς, per vomitum, alvi dejectionem, menses, urinam, tussis, sternutamenta: posterioris verò ἀσθητικῶς, per διαπνοήν, cum scilicet animal naturæ legibus gubernatur. Quod si quippiam, quod mordet, in animali consistat, & violenter moveatur, tunc sanè ab eo excremento facultas expultrix infestatur: ac propterea id ipsum, siue calidum sit, siue frigidum, quocunque maxime licet modo, è membrorum corpore expellere festinat: particulis scilicet sese contrahentibus ac constringentibus: deinde excrementum, quod in se continent, extrudentibus. Et si omnes simul hoc motu contractionis moveantur, totum corpus concussionem & quassationem corripitur: quæ cōcussio totius corporis rigor appellatur. Neceesse enim est, musculis omnibus concussis, unâ etiam articulos concuti: articulis autem concussis, ἐκτάσεις τε τινὰς καὶ κάμψεις ἀκροῖς συμπίπτειν, extensiones quasdam & inflexiones involuntarias incidere. *Cap. 5.*

79. Est tamen motus rigor à convulsione, palpitatione, & tussi, quæ à nuda intemperie organorum respiratorum provenit, diversus.

80. Convenit quidem rigor cum σπασμῶ, siue convulsione in eo, quia in utroque affectu muscoli incurvantur & flectuntur. Differt autem ab eo: quoniam rigor fit à facultate expultrice: σπασμὸς à morbo, *Cap. 5.* 81. Dif-

81. *Differt à palpitatione*: quia in hac similis motus non est. Nam unà cum musculo, qui à flatuoso spiritu dilatur, membrum attollitur: in rigore autem omnis musculi pars movetur, seipsam expurgans. Interea verò, cum partes musculi movetur, totus musculus concussus unà etiam secum articulum, cui inseritur, concutit. Ex quibus colligitur, rigorem à palpitatione tripliciter differre. I. quia rigor fit à facultate expultrice: palpitiō à morbo. II. quia in rigore quævis pars à se ipsa movetur, cum excrementum in se contentum expurgat. In palpitatione autem pars non à se ipsa, sed à flatulento attollitur spiritu. III. quia in rigore pars mota articulos secum cōcutit, & una movet: in palpitatione sola pars dilatata movetur. *Cap. 5.*

82. Motus, qui fit per inæquales nudas intemperies in musculis thoracis, etsi rigori similis sit: differt tamen non solum à motu, qui fit in tussibus alijs, ab intemperie cum affluxu humoris natis: sed etiam à rigore & horrore. *Cap. 5.*

83. Quod similis sit rigori, hinc constat: quia musculi thoracis concutiuntur perinde, ac in rigore, conanturque ea, quæ in carnibus ipsorum molesta sunt, per arteriam asperam expellere. Ideoq; levis & exigua tussicula, imò potius irritamentum ad tussendum consequitur. In cæteris autem tussibus, à confluxu alicujus humoris ortis, musculi thoracis vehementius irruunt in pulmonem, confertantque exufflationem excitant. In sternutatione adhuc vehementius eundem invadunt, cum spiritū, qui est in naribus, confertim expurgare conantur. In sternutatione enim uno impulsu tum à pulmone, tum à capite spiritus emittitur. Quod nonnulli, quibus facultas valde erat debilis, perspicientes, ut ea, quæ in thorace & pulmone continebantur, commodius eijcerent, nares laceffendo, sternutamentum cierunt: quò violentia hujus motūs, quod per tussim excernere non poterant, expuerent. *Cap. 5.*

84. Porro, utcumque tussis, ex nudâ intemperie organo-
rum respirationi inserviētium nata, eiusdem cum horrore
& rigore sit generis: differt tamen ab ijs, quoniam citiùs,
propter assiduum horum organorum motum, sentitur. Or-
gana enim respirationis nunquam quiescunt: sed perpetuò
moventur. Quocirca si per causam aliquam, vel minimâ,
suâ in actione impediuntur, statim quod molestat explo-
dere satagunt, tussimque movent. At dictum suprâ, mo-
tum huiusmodi διαθίσεις per totum corpus prodere ac ma-
nifestare. *Cap. 5.*

85. Utrum verò, quæ in tussi & rigore naturam, sive vim
ἐκκρίσιν infestant, humida sint, an aërea & flatulenta?
dignoscendum. Humida autem esse cognoscitur, si vacua-
tio eorum sensibilis sit: & quædâ per vomitum, quædam
per alvum, quædam per sudorem excernantur. Πνευματώδη
verò, aërea, & flatuosa, si vacuatio sit ἀδελος: ægrique nihil,
quod sensus notare possit, vel vomant, vel per inferna deij-
ciant, vel sudent: sive illa calida sint, sive frigida. *Cap. 5.*

86. Quod autem iusto calidiora horrorem rigoremque
excitare possint, calidissima balnea demonstrant. Si enim
ἐξαίφνης ἢ αἰθρώως, derepentè ac confertim, sine præcedente
aliquâ sensimque factâ calefactione, ejusmodi balnea quis
ingressus fuerit, statim horrore corripitur. Quod verò fri-
gida rigorem inducant, translatio in frigidum aërem con-
fertim facta ostendit. Nam & hæc ipsa horrorem parit. Id
quod etiam accidere solet, ubi in frigido aëre diutiùs com-
morari cogimur, quemadmodum hyberno tempore pere-
grinantibus usuvenire solet. *Cap. 5.*

87. Hæc excrementorum humidorum & aëreorum di-
gnotio notanda est propterea, quoniam plurimùm ad cu-
rationem confert. Nam rigor ab externâ causâ frigidâ exci-
tatus, non vomitu, sudore, alvi dejectione, aut aliâ hujus-
modi sensibili vacuatione curatur: sed calefactione. Or-

tus autem à causâ calidâ, refrigeratione tollitur. Quodsi non aërea, sed humida sit causa rigorem excitans, & quidem calida, febris sequetur. Ideoque sanabitur vacuatione aliquâ sensili, per vomitum, sudorem, aut dejectionem alvi. Sin causa interna frigida sit & aërea, calefactione, uti dictum, profligabitur. Humidæ autem interdum πένσις aliquando κένωσις: nonnunquam & πένσις, & κένωσις competunt. *Cap. 5.*

88. De rigore veterum erat placitum, quod illi semper febris succedat. Sed verū simpliciter non est: etiamsi quis διορισμὸν adhibeat: dicatque, eos rigores, qui χαρὶς τῆς ἐξωτερικῆς πρὸ φάσεως ἐκ τῆς σώματος ὁρμῶνται, citra causam externam à corpore nostro excitantur, febrem necessariò sequi. *Cap. 5.*

89. Visi enim sunt, & à *Galeno*, & à veteribus Medicis rigores, quos nulla sequuta febris: quanquam illi non adeò fuerint vehementes, ut ij, qui exquisitas tertianas, aut quartanas præcedunt: aut qui ardentes & præcalidas febres judicant. *Cap. 5.*

90. Solent autem ejusmodi rigores pravam diætam sequi: cum scilicet homines & otio indulgent: & cibo se infarciunt: & à cibo statim balnea ingrediuntur. Itaque nil mirum, veteres ejusmodi rigorem, quem nulla febris excipit, nunquam vidisse. Non enim eorum ætate perinde, ac *Galeni* seculo, homines in viétu peccabant: neq; tam crebrò lavabant. *Cap. 5.*

91. Sunt verò rigores, quos nulla febris sequitur, non, ut in tertianâ exquisitâ, validi & concussorij (κλονώδεις) sed Φρικώδεις μᾶλλον, horridi magis. Nam cum prava excrementa in corpore sunt congesta, principiò ἀνωμαλίαν sentimus. Quodsi aërea extiterint, δακνώδης ἐστὶν ἡ ἀσθησις, mordicationis sensus accedit: h. e. κόπος ἐλκώδης, qui sensum præstat ulceris. Post κόπον istum horrorem percipimus exiguum: dein paulò majorem: tum adeò magnum, ut jam rigo-

rigoris-aliquid participet. Tandem solum rigorem sentimus, qui partes corporis concurrit. At talis rigor, vehemens scilicet & concussorius, nunquam à frigidis procreatur humoribus. Hi enim ob crassitiem vehementer moveri nequeunt; sed in partibus, in quibus sunt collecti, hærent. Quod si aliquando extenuentur, rigorem quidem excitant, non tamen vehementem. Neque enim pituita eam nancisci potest tenuitatem & subtilitatem substantiæ, quam attenuatibilis flava. Hæc igitur velociter per corporis partes sensiles ferri potest, & validum excitare rigorem: pituita nequaquam. *Cap. 5.*

92. Veteres ergò rigorem, à crudis humoribus ortum, minimè habuerunt cognitum. Cognovisse autem eum, qui accidere consuevit in morbis lethaliibus, ex *Hippocratis aphor. 46. §. 4.* clarum est. In illo enim natura quidem insurgit, ut quæ inimica sunt, profliget: sed victa concidit: ideoque rigor *Hippocratis* iudicio signum est perniciosum. *Cap. 5.*

93. In quartanis autem febribus rigor mixtus est, ex calido nimirum putredinali, & frigido. Melancholia enim, ex quâ quartana gignitur, humor naturâ frigidus est. At putrefacta, calorem nanciscitur: & quidem tantum caloris, quantum putredinis. Rigor autem à calidis quoque causis ortum ducit: ut suprà dictum. *Cap. 5.*

94 Sed quæ causa est, inquires, quòd in rigore, sive à calidâ, sive à frigidâ causâ prodierit, extremæ corporis partes refrigerentur, & sanguine destituantur, & cum ijs tota quoque cutis, partésque illi substractæ? Respondet *Galenus*, ea ut inveniatur, operæ pretium esse, ut sciatur, esse quendam primum maximèque principem motum, τὴν ἑσώ τε καὶ ἑξώ πορὰν τῆς ἐμφύτης θερμασίας, caloris nativi tum ad interiora, tum ad exteriora delationem: huncq; motum in quibusdam animi perturbationibus evidentissimè observari. In his enim unâ cum ipso calore, & spiritus, & sanguis, modò

intrò, & ad ipsum principium, Cor, feruntur, contrahunturque: modò ad exteriora tendunt ac funduntur. *Cap. 5.*

95. In *timore*. n. intrò, & calor & spiritus, & sanguis abducitur, contrahiturq; unde partes extremæ refrigerantur. In *irâ* autē calor intenditur: quò fit, ut exteriora quasi ardeant. In *ἀγωνία*, *trepidatione ante certamen*, motus sunt vari; quoniam *ἀγωνία* compositus est affectus ex irâ & timore. Iam enim motus in illâ iræ est: jam timoris. Iræ est: ubi quis confidit, hostem se vincere posse. Timoris: cùm metuit, ne ab hoste vincatur. Et hos caloris nativi motus, qui in irâ & timore observantur, pulsus etiam cordis & arteriarum evidenter ostendunt. Timentibus enim pulsus sunt minimi, ac maximè debiles. Iratis contrà maximè ac validissimi. Ijs verò, qui versantur in *ἀγωνία* & ante certamen trepidant, inæquales. In *verecundiâ* calor primò ad interiora retrocedit: deinde ad exteriora redit. Quod si non redierit, timor est, non verecundiâ: Fit enim verecundiâ de repente: causamque habet mollitiem animi, & timorem pativum; cùm scilicet quis præstantioris congressum veretur, nec ejus consuetudinem ferre potest, adeoque ab illius conspectu se subducit. Unde fit, ut in eâ calor ad interiora veluti subterfugiens, recedat; non tamen, quemadmodum in timore accidit, illic permaneat: sed λογισμῶ, ratione, τὸ παθητικὸν τῆς ψυχῆς, patibilem animi partem excitante, redit, & foràs fertur: simili modo motionis, quò in frigidâ lavatione calor revocatur. At in timore calor ad exteriora non redit, sed magis magisque extinguitur, adeò ut quidam etiam in rigorem incidant. *Cap. 5.*

96. Cæterum, quod in timore homines patiuntur ἀθρόως, id in tristitia sustinent κατὰ βραχὺ, paulatim. Differunt enim hæc ψυχικὰ πάθη, non ὅλω τῷ γένει: sed tantum μεγέθει σφοδρότητι. *Cap. 5.*

97. Hic caloris & sanguinis motus ad interiora & exteriora.

riora, facit, ut in quibusdam animi pathematibus homines moriantur: in alijs verò ferventur. Nam nonnulli, quibus *ψυχρόιον φύσει ἄδυνες*, animi tūta natura debilis erat, ob *timorem magnum*, ac subitanēum mortui sunt. Causa duplex est: vel quia calor nativus extinctus: vel quia suffocatus: idq; ob universi sanguinis ad cor repentinam regurgitationem. *Ex iratis* verò nemo obijisse legitur: eò quod in irā, neq; calor extinguitur: neque vitale robur dissolvatur. *Pra nimio gaudio* *μικρόψυχοι* quidam, pusillanimēs, interierunt, non aliter, quā in timore. In hoc. n. animi pathemate calor cum robore ac fervore, non perinde atque in irā, foras fertur: sed contrā, si quid anteā roboris habuit, id nunc exolvitur & laxatur. Itaque laxatus dū ad exteriora fertur, prorsus dissipatur. *Cap. 5.*

98. *Dolor* (*πόνος*) gaudio contrarius est: & propterea symptomata parit gaudio contraria. Ut enim gaudium calorem nativum ad exteriora moveri cogit: sic dolor eandem ad interiora pellit. Itaque symptomata inferi maximo timori similia. Dolorē siquidem laborantes, & decolores fiunt, & refrigerantur, & rigore corripuntur, & tremunt, & pulsus edunt minores, & omnino etiam pulsū privantur, tandemque moriuntur, haud aliter ac ij, qui percelluntur ac consternantur. Causa est: quoniam in his quoq; calor ad cor refugit, simulque resolvitur atq; extinguitur. *Cap. 5.*

99. Cū verò dolor mortem adferre possit, non minus, si etiam *λεπτοψυχίαν, ἢ τὰ λεπτοψυχίας ἀκόλῃα συμπτώματα*, tūm alia, tūm vel in primis etiam *ἀκρίσιον ἐκκρίσιν τῶν περιτωμάτων*, invitam excrementorum excretionem inveniat. *Cap. 5.*

100. Verū, non est praesentis instituti, in hisce diutius immorari. Ideoque ad rem redeundum: sciendūque, omnia, quæ hactenū de animi perturbationibus dicta sunt, non aliam ob causam dicta esse, quā ut clariū cau-

sa eluceret, cur per rigores extrema corporis refrigerentur? nimirum quod natus calor sentiens ea, quæ corpori molesta sunt, unâ cum sanguine & spiritu ad interiora, perinde ut in timore, refugiat.

101. Quod autem in rigore externæ tantum partes frigeant, internæ verò caleant, inde constat, quia frigus in illis tactu percipitur: fitis autem rigoris tempore quosdam vehementer cruciat: quæ certè caloris internarum est indicium. *Cap. 5.*

102. Quod verò refrigerationes non præter rationem, sed ἐν λόγῳ, ijs, qui rigore laborant, eveniant, hinc colligere licet. Nam si atrociores dolores, qui in unâ aliquâ corporis parte, v.g. colo intestino, consistunt, & λεπτοψυχίας, & κατὰ φύσιν inducunt: cur non illi, qui universum occupât corpus, quales sunt, qui in rigore accidunt (neque enim rigor, qui totius corporis est concussio, sine dolore fieri potest) si non λεπτοψυχίας & θάνατον, saltem κατὰ φύσιν, refrigerationem extremarum partium efficerent? Est namque dolor, qui in rigore fit, reliquis omnibus doloribus ἐμμενής: cum sit molestus sensus: differt autem ab ijs, qui interimunt, μεγέθει & χρόνῳ: quia & minor est, & brevius durat. Colicus namque dolor sæpè duobus diebus continuis hominem cruciavit. Rigor verò, quantò est vehementior, tantò solet esse brevior. *Cap. 5.*

103. Si quæras, qualis is sit motus caloris, qui in rigore deprehenditur? Respondet *Galenus*, similem esse illi, qui in verecundiâ & ψυχολασίᾳ, frigidâ lavatione fieri consuevit. Movetur enim initio ad interiora, ac pugnat certatq; contra ea, quæ sunt molesta, donec unâ cum expultrice facultate extirpaverit omnia. Verum propter vehementes ἐμπηώσεις, incurSIONES, & quia in profundo corporis est coarctatus, ad exteriora redit ἀθρόως, febrémque à rigore accendit, præsertim cum ad ejus accensionem auxiliarem habeat

beat materiam calidam, acrem, atque mordacem. Quod si facultas inter certandum prius fatigetur, quam noxia fugaverit, mors obrepere solet. Fatigatur autem, priusquam hæc profligaverit, vel δι' ἀρρώσϊαν, cum est debilis ac infirma: vel διὰ μέγεθος αἰτίης, propter causæ magnitudinem. In priori enim casu à noxiâ materia vincitur: in posteriori verò, causa superari à facultate nequit. Cap. 5.

104. *Vt, quæ fusiùs hætenùs de motibus vitiosis, qui cap. i. fuerunt enumerati, faciliùs memoria mandentur, & intelligantur meliùs, Galenus brevem illorum ἐπίλογον, sive ἀνακεφαλαίωσιν instituit: & primùm quales motus sint tussis, sternutatio, singultus, rigor, pandiculatio, ositatio, ἀνωμαλία & pruritus? ostendit: deinde quæ illorum causa sit, & quomodo inter se differant? exponit.*

*Partis prima mem-
brum tertium.*

105. Sunt autem affectus enumerati omnes expultricis facultatis motus. Per eos enim expellere conatur ea, quæ corpori molesta sunt & noxia. Differunt verò inter se magnitudine & vehementiâ. Nam *tussis, sternutatio, singultus & rigor* motus τῆς ἐκκριτικῆς δυνάμεως sunt ἰσχυροὶ & βίαιοι, validi ac violenti. *Pandiculatio & ositatio* μέτριοι, mediocres. *Horror* μετρίωτερος. Multò adhuc moderatior motus est ἡ ἀνωμαλία: utpote quæ propemodùm motus dici minimè mereatur, sed potius molestus sensus. *Ανωμαλία* similis est sensus, qui in *lassitudine ulcerosa*, & præcipuè in *pruritu* esse solet. Nam in hoc symptomate sensus duntaxat est πένεσις τῶν κνησμοδῶν, excrementorum, quæ pruritum excitant. Neque enim hæc aliter nominare licet, nisi quis illa νιτρώδη, nitrosa, & αἰμυρά, salsa, ἢ πικρά, amara, appellare voluerit. Talis enim illorum natura est. Cap. 6.

106. Discitur verò hæc eorum natura dupliciter. I. ἀπὸ τῶν ἔξωθεν, ex rebus externis. II. ἀπ' αὐτῶν τῶν κατὰ τὸ σῶμα, ex ijs, quæ sunt in nostro corpore. Cap. 6.

107. *Ex rebus externis, urticâ scil. scillâ, muriâ, & aquâ mari-*

marinâ. Nam hæc, & alia, vel amaram in se qualitatem habent, velut urtica & scilla: vel falfam, ut muria, (ἀλμη) & aqua marina. Itaque, qualem sensum hæc ipsa corpori admota exhibent: talem etiam, quæ pruritum excitant excrementa, sensum movere solent.

108. *Ex rebus quæ in corpore sunt*, humoribus nempe acribus & mordacibus. Etenim pruritus eos vexare solet, qui sordibus scatent, & balnea negligunt: qui cruditatibus laborant; qui pravo utuntur victu: non aliam ob causam, nisi quod excrementa hæc in corpore nata falsa sint, acria atq; mordacia. Præ omnibus autem alijs pruritus infestat ψώρα & λέπρα laborantes. Causa triplex est. I. quia humor pruritum excitans est copiosior, quàm in illis, qui sordibus abundant, & balnei usum intermiserunt. II. quia idem crassior est, adeoque cuti infixus firmiterq; impactus. III. quia nonnunquam etiam lentus & glutinosus est. Unde fit, ut nihil juventur, etiamsi scabendo se excoriant. Salfus quippe humor adhuc cuti infixus manet; ideoque pruritum movere minimè cessat. *Cap. 6.*

109. Causa horum vitiosorum motuum est, uti supra uberiùs expositum, κακοχυμία. Differunt autem inter se quadrifariam. I. ποσότητι τῆς αἰτίας, causæ quantitate. II. ποιότητι, ejusdem qualitate. III. ἡσυχία, quiete. IV. κίνησει, motu. *Cap. 6.*

110. Causa enim *in pruritu* est pauca, tenuis, falsa & immota. In *lasitudine ulcerosa* pauca, tenuis, mordax & immota. In *leprâ & scabie* multa, crassa, falsa & immota. In *horrore* pauca, tenuis, mordax & motum quendam obtinens exiguum. In *rigore* copiosior est, mordacior, vehementerque movetur. Et in *rigore* quidem *maximo* plurima, mordacissima, & σφοδρότατα κινημένη, vehementissimè mota. In *minimo* verò, mediocriter vel in qualitate, vel in mordacitate, vel in motu aucta. Sunt verò inter maximum & mini-

minimum rigorem variæ differentię, τῶ μᾶλλον τε καὶ ἥττον ἀλλήλων διαφερόμεναι, ratione majoris ac minoris variantes: nempe pro ut causa, vel in quantitate, vel in qualitate, vel in motu variat. Cap. 6.

III. Atque hæc sunt symptomata, quorum causa tū in cute, tū in carne illi subjēctā consistit. Inter ea verō, quorum causa in profundioribus corporis partibus consistit, numerantur *tussis*, *sternutatio* & *singultus*. Cap. 6.

112. *Tussis* enim causa in pulmone, faucibus & thorace latet. *Sternutationis* in naribus. *Singultus* in ventriculo & stomacho. Cap. 6.

113. Differunt igitur, quod causæ eorum in diversis corporis partibus hæreant. Conveniunt autem in eo: quod expultrix facultas in omnibus hisce tribus symptomatibus seipsam ad vehementissimos motus excitet: idq; nullam aliam ob causam, quàm ut ea, quæ infestant, explodat: quæadmodum suprà dictum. Ubi etiam multa de illorum generatione tradita: & quod *sternutatio* ex accidenti humorū, qui in pulmone delitescunt, licet horum gratiā minimè instituatur, remedium sit. Per se enim ea, quæ in naribus sunt, expellit. Per accidens autem, quæ in thorace ac pulmone consistunt, extrudit: idque per nervos, veluti per longas quasdam manus, ad thoracis musculos descendentes. Per hos enim thoracem non tantum dilatat: verum etiam contrahit: illicq; contenta excrementa excutit. Pari modo, etsi *singultus* per se ejiciat ea, quæ ventriculum infestant: tamen hæc ipsa sternutamenta per accidens exturbant, adeoque singultus sunt remedia. Musculi quippe abdominis per sternutamenta intenti ac contracti ventriculum simul impellunt, ut violentior in causas molestas, & singultum creantes, quas expellere nititur, fiat incurfusio. Cap. 6.

114. *Supersunt cause symptomatum enarrande, quæ principi.* Pars libri *pibus accidunt functionibus*, nimirum Imaginationi, Ratio. *Secundæ* cinationi, & Memorix.

115. Sunt verò in illis, ut in omnibus alijs actionibus,

tria prima symptomatum genera. I. ἀπώλεια τῆς ενεργείας, *actionis abolitio*. II. βλάβη, *noxā*, sive *lesio* & *diminutio actio- nis*. III. εἰς ἑτέραν ἰδέαν ἐκτροπή, *in alteram speciem degeneratio*, sive *depravata actio*. *Cap. 7.*

116. *Abolitio* fit in stultitiā & oblivione. Hæc verò sym- ptomata non rarò à morbis accersuntur, si finiantur in ab- scessum, h. e. in ejusmodi affectum degenerent, in quo hu- mores, qui priùs aliquam partem infestabant, eā relictā, in aliam abscedunt ac transferuntur. Vidit quippe *Galenus* quosdam, qui, humoribus ab alijs corporis partibus ad ce- rebrum translatis, in tantam inciderant oblivionem, ut & literarum, quas didicissent, & artium, quarum habuissent peritiā, & nominum, quibus essent insigniti, fuerint obli- titi. Et hoc ipsum quoq; *Thucydides* notat l. 2. belli *Pelopon.* Scribit enim, quosdam, qui à pestilentiā servati fuerunt, ne- que se ipsos, neque amicos suos agnovisse: Visi insuper alii, qui διὰ γῆρας ἑσχαλόν, propter extremam senectutem stulti & obliviosi facti. Ex quo colligitur, & μώρωσιν, & λή- θην, & stultitiam, & oblivionem à frigore provenire. *Cap. 7.*

117. Quòd autem vitia hæc à frigidā cerebri intemperie proficiscantur, primùm medicamenta refrigerantia pro- bant. Assumpta enim & admota μώρωσιν & λήθην inducunt. Deinde horum symptomatum γένεσις & λύσις planum facit. Sensim enim fiunt & solvuntur: quod nequaquaquam contingeret, si ab humore aliquo procrearentur. Tùm e- nim subitò, & generarentur, & finirentur, ut apoplexia & e- pilepsia, quos affectus *Galenus* dicit à pituitosis oriri humo- ribus, in cerebri ventriculis coacervatis. *Cap. 7.*

118. Alterum principium *actionum* σύμπτωμα est *diminutio*, quam *Galenus* suprà nominavit βλάβην; hic autem μέτρια βλάβην & οἷον νάρκην τῆ λογισμῆ τε & τῆς μνήμης, *noxā* medio- crem, ac veluti torporem rationis ac memoriæ appellat. Causa eadē est, quæ stultitiæ & oblivionis, sed levior ac re- missior: nimirum simplex & nuda cerebri refrigeratio: aut medicamentum refrigerans, ore sumptum, capitivè foris admo-

admotū: aut humor frigidus in cerebro congeſtus. *Cap. 7.*

119. *Tertium earundem actionum σύμπλωμα* est depravatio: ad quam pertinent Φρενίτιδες, μανία, μελαγχολικαὶ παράνοιαι, καὶ παραΦροσύναι ἐν τοῖς πυρετοῖς. *Cap. 7.*

120. Hæc symptomata omnia, vel à vitiōsis humoribus, vel à cerebri intemperie excitantur. Appellatur autem Φρενίτις delirium, quod cum febre accidit. Μανία delirium, quod sine febre fit. Utrumq; delirium à causis modò indicatis ortum trahit. Μανία quidem interdum à calidis mordacibusque humoribus: qualis maxime bilis est flava: sæpè etiam à calidiore cerebri intemperie. Φρενίτις non simpliciter, ut μανία, à calidis humoribus originem ducit: sed etiam Φλεγμονὴν cerebri & meningum ejus sequitur. Μελαγχολικαὶ παράνοιαι frigidiorē humorem, melancholicū scil. pro causā agnoscunt. Αἱ παραΦροσύναι ἐν τοῖς ἄλλοις πυρετοῖς nascuntur, calido humore in cerebro redundante. *Quæ in vigore acutissimarum febrium consistunt*, pro causā habent αἵματιν δακνύοντα καὶ θερμὸν ἀναθυμιάμενον ἐπὶ τὸν ἐγκέφαλον, vaporem calidum & morosissimum, ad cerebrum evaporantem. Παράνοιαι μελαγχολικαὶ πολυεῖδεις εἰσὶν, varias habent species ac differentias, prout in ipsis apparuerint imaginationes. In omnibus autem communia sunt duo animi pathemata, quæ etiam ab Hippocrate aphor. 23. sect. 6. sunt notata: φόβος καὶ δυσθυμία, timor & mæstitia. Omnes enim mæsti sunt ἀλόγως, sine causā. Neque si roges, quam obrem tristentur? dicere possunt. Ac non pauci eorum mortem, aliāq; nonnulla, haudquaquam metuenda, metuunt. Reperiuntur verò, qui mori vehementer desiderant. *Cap. 7.*

121. Horum deliriorum melancholicorum causa est μελαίνη χολή: idcirco; nihil mirum, melancholicos timidos esse. Novimus enim, nihil eorum, quæ extra corpus nostrum sunt, nos æquè terrere, ac tenebras. Quare, cum aliquid tenebris simile, ut humor melancholicus, τῷ λογικῇ καὶ μορίῳ τῆς ψυχῆς, rationali animæ parti, circumfunditur, necesse est, hominem timere. Ratio est: quia semper timo-

ris causam in corpore circumfert. Nam quod nobis accidit extrinsecus, cum aër ad tēpus aliquod densissimis tenebris est obscuratus, id melācholicis ab interno, & ex ipso corpore excitatur: occupante cerebrum, vel μελάνη χολή, vel ἀναθυμιάσει ἀτμῇ μελαγχολικῇ: ut fieri videmus eā in melancholiæ specie, quam Φυσώδη, flatulentam, καὶ ὑποχονδριακὴν appellat.

COROLLARIA

Ex thesibus deprompta.

- I. **A**N singultus sit species convulsionis? Propriè loquendo non.
- II. Sitne senectus humida, an sicca? Posterius placet.
- III. Num vinum frigidus pariat morbos? Non per se: sed per accidens.
- IV. Pulsentne arteria à seipsis, ob facultatē sibi ingentiam, ut Cor? N.
- V. Sitne idem motus arteriarum & cordis? Affirmatur.
- VI. Vtrum pulmo à seipso moveatur, an à thorace? Posterius defendimus cum Galeno.
- VII. Sitne respiratio motus naturalis? an animalis? an mixtus? Vltimum tuemur.
- VIII. An horror & rigor specie inter se differant? N.
- IX. Nunquid rigor καυσθ̄ superveniens causa sit sanans: an signum duntaxat solutionis καύσεως? Posterius asserimus.
- X. Sintne potissima & frequentissima πρᾶξις causa, vacuatio & inanitio? Sic placet Hippocrati. (Omniind.)
- XI. Num in motu tremulo, & tonico aliquid agat facultas animalis?
- XII. Qualis sit motus Tussis? Mixtus: quia partim ab expultrice facultate: partim verò à thoracis musculis instituitur.
- XIII. Sitne retentio facum & urina magis animalis, an naturalis? Prius arridet.
- XIV. An urina & facum expulsio naturalis magis sit, an animalis? Naturalis magis.
- XV. An calor & spiritus prima sint organa anime? A.
- XVI. Vtrum lepra Græcorum & Arabum specie inter se discrepent? A.
- XVII. An timiditas Melancholicorum à nigredine humoris melancholici proficiatur? Non videtur.
- XVIII. An quis pre gaudio & timore mori possit? A.
- XIX. An omnis quartana ex melancholici humoris putredine nascatur? Negatur.